



Inatsisartuni ilaasortaq
Kristian Jeremiassen
Inuit Ataqatigiit

18-07-2024
Suliap nr. 2024 - 14150
Akt. id. 24358276

Postboks 260
3900 Nuuk
Tlf. (+299) 34 50 00
Fax (+299) 34 63 64
E-mail: isn@nanoq.gl
www.naalakkersuisut.gl

Utoqqalinersiallit ingjallorteqarlutik angalasarnissaannut tunngatillugu § 37 naapertorlugu apeqqutip nr. 161-ip akineqarnera

Asasara Kristian Jeremiassen.

Apeqqutinut qujanaq. Apeqqutigineqartut tullinnguuttuni ataasiakkaarlugit uteqqinneqarput akineqarlutillu.

1. Sooruna utoqqalinersiutilik inooqataa nulia/uia imaluunniit nuliaasaa/uijusaaluunniit kræftimik nappaateqarpat Danmarkimi katsorsarneqarnerani inatsisitigut pisortaniit akiliunneqarluni orninneqarsinnaanngittoq?

Isumaginninnermut inatsimmi atuuttumi utoqqalinersialinnut qanigisaasut angalanermi ingjallortaanissaat periarfissaanngilaq.

Tamatumunnga erseqqissumik tunngavissaqarpat aatsaat Peqqinnissaqarfik ingjallortinut aningaasartuuteqarsinnaavoq. Peqqinnissaq pillugu inatsit naapertorlugu peqqinnissakkut sulisut pisariaqartitsippata imaluunniit napparsimasoq tassanngaannartumik inuunerminik aarlerinartorsiorpat ingjallorteqartitsisoqarsinnaatitaavoq. Taamaattoqartillugu Peqqinnissaqarfik sulisunut eqqaaneqareersunut ingjallorteqartitsinnermut taamaallaat aningaasartuuteqassaaq.

2. Ilumoorpa inatsisitigut qulaani taaneqartoq kommune periarfissaqartitsinngitsoq kræftimik inooqataasumik orninneqarsinnaannginnera?

Inatsit naapertorlugu inooqataasut kræfterlutik napparsimasut katsorsarneqarfissaannut ingiaqataanissaannut tunngatillugu kommunip akiliisinnaannginnera ilumoorpoq. Isumaginninnermut inatsimmi aamma tapersersuinissamut tunngavissaqanngilaq. Taamaattorli pisariaqartitsineq malillugu ikiorsiissutit pillugit pisortanit ikiorserneqarnissaq pillugu inatsit aqqutigalugu Kalaallit Nunaata iluani qanigisaasup ingjallortaalluni angalanissaanut ikiorsiisoqarsinnaavoq.



3. Utoqqalinersialik imaluunniit siusinaartumik sulisinnaajunnaarnersiutilik inatsit suna atorlugu kræftimik napparsimasoq Danmarkimut orninneqarsinnaava inooqataasumiit?

Piffissami matumanerpiaq Danmarkimut katsorsartikkiartornermut atatillugu ingiallorteqarnissamut tunngatillugu Kalaallit Nunaanni inatsisitigut tunngavissaqanngilaq.

4. Naalakkersuisut inatsit ajoqutaasoq aaqqinniarlugu qaqugu sulissuteqassappat?

Utoqqarnut tapersersuineq pillugu nutaamik inatsiseqangajalerpoq, tamatuma 2024-mi Inatsisartut ataatsimiinneranni akuerineqarnissaa naatsorsuutigineqarpoq. Peqqissutsimut Naalakkersuisoqarfiup suleqatigineratigut inatsisiliornermi apeqqutit taakku ilanngunneqassapput, tassani Peqqinnissaq pillugu Ataatsimiititaliarsuup innersuussutai aamma eqqarsaatigineqarumaarput.

Inussiarnersumik inuulluaqqusillunga



Jess Svane

INUIT ATAQATIGIIT



10. juli 2024

Inatsisartut Suleriaasianni § 37 imm. 1 naapertorlugu Naalakkersuisunut apeqquut imaattoq matumuuna saqqummiuppara.

Naalakkersuisunut apeqquut:

- 1. Sooruna utoqqalinersiutilik inooqataa nulia/ua imaluunniit nuliaasaa/uijusaaluunniit kræftimik nappaateqarpat Danmarkimi katsorsarneqarnerani inatsisitigut pisortaniit akiliunneqarluni orninneqarsinnaanngittoq?**
- 2. Ilumoorpa inatsisitigut qulaani taaneqartoq kommune periarfissaqartitsinngittoq kræftimik inooqataasumik orninneqarsinnaannginnera?**
- 3. Utoqqalinersialik imaluunniit siusinaartumik sulisinnaajunnaarnersiutilik inatsit suna atorlugu kræftimik napparsimasoq Danmarkimut orninneqarsinnaava inooqataasumiit?**
- 4. Naalakkersuisut inatsit ajoqutaasoq aaqqinniarlugu qaqugu sulissuteqassappat?**

(Inatsisartunut ilaasortaq Kristian Jeremiassen, Inuit Ataqatigiit)

Tungavilersuut:

Ajoraluartumik periarfissaqanngilaq nakorsarluunniit innersuussingaluarpat utoqqalinersialik inooqataa kræfteqarsimappat Danmarkimi katsorsartinnerani ilanginissaanut pisortaniik akiliunneqarluni utoqqalinersiaqarnini pissutigalugu, tamanna ajornartorsiut Kommune Qeqertalimmi nalaapparput itingartitsisoqarluni inatsisitigut periarfissaqanngimmat napparsimasut orninneqarnissaa Danmarkimut.

Utoqqalinersiallit taama pineqarsinnaanngillat inooqataa napparsimappat pisortaniit akiliunneqarsinnaanatik uffa ukiorpassuarni sulereeraluarlutik sivilisuumillu Danmarkimi katsorsartittoqartussaalluni inatsisit pissutigalugit Kommune Qeqertalik itingartitsisariaqartarami.

Taamaammat apeqqutit allanneqartut sumik periarfissaqarneranik paasisaqarusullunga Naalakkersuisunut saaffinginnippunga Kommune Qeqertalik inassuteqarneratigut.

Ullut suliffiusut qulit qaangiutsinnangit akineqarnissara kissaatingivara.